

Հաստատում եմ՝
Երևանի պետական համալսարանի
գիտական հարցերի գծով պրորեկտոր,
Ֆիզ.-մաթ. գիտ. թեկնածու
Ռաֆայել Բարխուդարյան /



(Signature)

29 մայիսի 2026թ

ԱՌԱՋԱՏԱՐ ԿԱԶՄԱԽՐՈՒԹՅԱՆ ԿԱՐԾԻՔ

ԼԻԼԻԹ ԱՐՄԵՆԻ ՂԱԶԱՆՉՅԱՆԻ

**«ԱՆՁԻ ԻՐԱՎԱԿԱՆ ԴՐՈՒԹՅԱՆ ՀԻՄՆԱԽՆԴԻՐՆԵՐԸ.
ՍԱՀՄԱՆԴՐԱԻՐԱՎԱԿԱՆ ՀԵՏԱԶՈՏՈՒԹՅՈՒՆ»**

թեմայով

ԺԲ.00.02 - «Հանրային իրավունք (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում)» մասնագիտությամբ իրավաբանական գիտությունների դոկտորի գիտական աստիճանի հայցման համար ներկայացված ատենախոսության վերաբերյալ

Երևանի պետական համալսարանի իրավագիտության ֆակուլտետի Սահմանադրական իրավունքի ամբիոնը՝ մասնակցությամբ ամբիոնի վարիչ, ի. գ. թ., դոցենտ Վ.Ն. Այվազյանի, ի.գ.թ., դոցենտ Հ. Ա. Ենգոյանի ի. գ. թ., դոցենտ Ռ. Զ. Մախմուդյանի, ի. գ. թ. Ք.Ս. Ալեքսանյանի, ի. գ. թ. Տ.Գ. Նաղդալյանի, ի. գ. թ. Կ. Վ. Հակոբյանի, ի. գ. թ. Ն.Ա. Ավազյանի քննարկեց Լիլիթ Արմենի Ղազանչյանի՝ «Անձի իրավական դրության հիմնախնդիրները. Սահմանադրաիրավական հետազոտություն» թեմայով ԺԲ.00.02 - «Հանրային իրավունք (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում)» մասնագիտությամբ իրավաբանական գիտությունների դոկտորի գիտական աստիճանի հայցման ատենախոսությունը և հանգեց հետևյալին:

Լիլիթ Արմենի Ղազանչյանի ատենախոսությունը նվիրված է արդի իրավագիտության կարևորագույն հիմնախնդիրներից մեկի՝ անձի իրավական դրության համալիր հետազոտությանը և առկա հիմնախնդիրների բացահայտմանը:

Գրախոսվող դոկտորական ատենախոսության թեման արդիական է և պահանջված, քանի որ ժամանակակից համաշխարհայնացման պայմաններում անձի իրավական դրությունն ու վերջինիս տարրերի ձևավորման առանձնահատկությունները հանդիսանում են ժողովրդավարական, իրավական, սոցիալական պետության կայացման ու կայուն զարգացման հիմնական նախադրյալները: Ավելին, իրավական դրությունը հանդիսանում է համախմբող, կարծրացնող հասկացություն, որը միահյուսում և համակարգում է «անձ-հասարակություն-պետություն» փոխհարաբերությունները: Իրենց հերթին, անձի իրավական դրության տարրերի տարաբնույթ դրսևորումներն, իրենց անմիջական ազդեցությունն են թողնում քաղաքացիական հասարակության, ակտիվ շարժումների ձևավորման և զարգացման վրա, որոնք էլ իրենց հերթին թելադրում են ժողովրդավարության դրսևորման առանձնահատկությունները տվյալ հասարակությունում և պետությունում:

Քննարկվող ատենախոսությունը հանդես է գալիս որպես անձի իրավական դրության հիմնախնդիրների բացահայտման և դրանց լուծման արդյունավետության բարձրացման նպատակով համակարգված և գիտականորեն հիմնավորված առաջարկությունների և դատական պրակտիկայում այդ խնդիրների լուծման բարձր պահանջվածության միջև հակասության հաղթահարման միջոց:

Աշխատանքի համալիր վերլուծությունից կարելի է եզրակացնել, որ գրախոսվող դոկտորական ատենախոսությունը, որը հանդիսանում է հեղինակի գիտական և պրակտիկ երկարատև աշխատանքի արդյունք, նվիրված է նաև անձի իրավական դրության ձևավորման և զարգացման համար հիմնարար ազդեցություն ունեցող հիմնական իրավունքների, ազատությունների, օրինական շահերի և պարտականությունների ամբողջության լիարժեք ուսումնասիրությանը, դրանց իրացման առանձնահատկությունների բացահայտմանը, ինչպես նաև անձի իրավական դրության սկզբունքների և տեսակների բովանդակային յուրահատկությունների վերլուծությանը: Առանձնակի ուշադրության են արժանացել անձի քաղաքացիության սոցիալական և իրավաբանական բովանդակությունը և դրանց ուրույն կապը պետության հետ՝ հիմնված քաղաքացիության ինստիտուտի առկայության, անձի իրավունքների, ազատությունների ձեռքբերման և պարտականություններ կրելու առանձնահատկությունների վրա:

Դոկտորական ատենախոսությունը բաղկացած է ներածությունից, տասնութ ենթագլուխ պարունակող հինգ գլուխներից, եզրակացությունից և օգտագործված գրականության ցանկից: Աշխատանքի այսպիսի կառուցվածքը, ընդհանուր առմամբ, համահունչ է այն խնդիրներին ու նպատակներին, որոնք իր առջև դրել է հեղինակը:

Աշխատանքի **ներածության մեջ** հիմնավորված են հետազոտության թեմայի արդիականությունը, թեմայի մշակվածության աստիճանը, հետազոտության տեսական, նորմատիվ-իրավական, փորձառական հիմքերը, մեթոդաբանությունը, հետազոտության օբյեկտը և առարկան, նպատակը և խնդիրները, գիտական նորույթը, պաշտպանության ներկայացվող հիմնական դրույթները, ատենախոսական աշխատանքի տեսական և գործնական նշանակությունը, հետազոտության արդյունքների հավաստիություն ու օբյեկտիվությունը, արդյունքների փորձարկումն ու դրանց ներդրումը, ինչպես նաև ատենախոսության կառուցվածքը:

Աշխատանքի առաջին՝ **«Անձի իրավական դրությունը, որպես սահմանադրաիրավական գիտակարգ. մեթոդաբանական խնդիրներ»** վերտառությամբ գլխում հեղինակը հանգամանորեն վերլուծել է անձի իրավական դրության տեսանկյունները՝ սահմանադրական իրավունքի հայեցակարգային մոտեցումների առումով, որի շրջանակներում ներկայացվել են «անձի իրավական կարգավիճակ» և «անձի իրավական դրություն» հասկացությունների ընդհանրություններն ու տարբերությունները, անձի իրավասուբյեկտիվության սահմանադրաիրավական էությունը և բովանդակային առանձնահատկությունները, վերջինիս կապը կամքի ազատության դրսևորման հետ, ինչպես նաև «իրավունակություն, գործունակություն և դելիկտաունակության» եռամիասնության դրսևորման փուլի առանձնահատկությունները: Առանձնակի ուշադրության են արժանացել անձի քաղաքացիության սոցիալական և իրավաբանական բովանդակությունը և դրանց ուրույն կապը պետության հետ՝ հիմնված քաղաքացիության ինստիտուտի առկայության, անձի իրավունքների, ազատությունների ձեռքբերման և պարտականություններ կրելու առանձնահատկությունների վրա:

Ատենախոսության երկրորդ՝ **«Անձի իրավական դրության հայեցակարգային մոտեցումների էվոլյուցիան. քննական և իրավահամեմատական վերլուծություն»** վերտառությամբ, գլխում հանգամանորեն քննարկում են անձի իրավական դրության հայեցակարգային մոտեցումների զարգացման սոցիալ-իրավական հիմքերը, դրանց էական առանձնահատկությունները, ինչպես նաև ռուսական սահմանադրական ուսմունքներում անձի իրավական դրության վերաբերյալ տարաբնույթ մոտեցումները: Քննարկվող գլխի համատեքստում հեղինակն անդրադարձել է ինչպես խորհրդային ժամանակաշրջանի անձի կարգավիճակի վերաբերյալ իրավագաղափարական մոտեցումներին, այնպես էլ ՀՀ-ում իրավական համակարգի ձևավորմանը զուգընթաց՝ անձի իրավական դրության դոկտրինալ և օրենսդրական ամրագրման զարգացման գործընթացի առանձնահատկություններին:

Ատենախոսության երրորդ՝ **«Անձի իրավական դրության համակարգային ամբողջականության բաղադրիչների դրսևորման առանձնահատկությունները»** վերտառությամբ գլխում, բացահայտվում են անձի սահմանադրական (հիմնական) իրավունքների և ազատությունների էական հատկանիշները և բովանդակությունը, ինչպես նաև դրանց օրգանական կապը անձի իրավական դրության մյուս տարրերի հետ: Տվյալ համատեքստում հեղինակը լուսաբանում է «օրինական շահեր» և «անձի պարտականություններ» հասկացությունների սահմանադրաիրավական բովանդակությունը, դրանց փոխկապակցվածությունը արդի գլոբալ իրավական զարգացումների համակարգում: Ավելին, հեղինակը դիտարկում է սահմանադրությամբ ամրագրված անօտարելի արժանապատվությունը, որպես անձի իրավունքների և ազատությունների հիմք, այսինքն՝ սկզբնաղբյուր, որից բխում է անձի իրավական կարգավիճակն ամբողջ ծավալով:

Աշխատանքի չորրորդ գլխում, որը կրում է **«Անձի իրավական դրության դրսևորումները, սկզբունքները և առանձնահատկությունները իրավակարգավորումների ոլորտում»** խորագիրը, լուսաբանվում են անձի իրավական դրության տեսակների, սկզբունքների առանձնահատկությունները, ինչպես նաև վերլուծության են ենթարկվում իրավական դրության հիմնահարցերը բազմազան և բազմատեսակ իրավակարգավորումների ոլորտում: Քննարկվող գլխի շրջանակներում հեղինակը անձի իրավական դրության սկզբունքները դիտարկում է որպես մեկ ամբողջական և միասնական համակարգ, որը կանխորոշում է անձի ոչ միայն իրավական, այլև փաստացի դրությունը տվյալ հասարակությունում:

Ատենախոսության հինգերորդ՝ **«Անձի իրավական դրության սոցիալ-իրավական երաշխիքների համակարգը և դրա կարարելագործման հիմնախնդիրները արդի սահմանադրաիրավական զարգացումների տեսանկյունից»** վերտառությամբ գլխում հեղինակը բազմակողմանի վերլուծության է ենթարկում սոցիալական երաշխիքների տեսակներն ու դասակարգման առանձնահատկությունները: Հեղինակը նաև շեշտադրում է, որ անձի իրավունքների, ազատությունների և օրինական շահերի լիարժեք իրացման համար անհրաժեշտ են իրավաբանական հատուկ երաշխիքներ, այսինքն՝ միասնական իրավական ձև ունեցող միջոցներ, որոնց նպատակն է՝ անմիջականորեն ապահովել իրավունքների, ազատությունների, պարտականությունների և օրինական շահերի իրավաչափ կիրառումը, դրանց իրական պահպանությունն ու պաշտպանությունը:

Ատենախոսության եզրափակիչ մասում շարադրված են հետազոտության կատարման արդյունքում հեղինակի կողմից արված եզրահանգումներն ու առաջարկությունները:

Աշխատանքի դրական արժանիքներից է նաև այն, որ հեղինակը լիարժեքորեն է օգտագործել ազգային և միջազգային նորմատիվ-իրավական նյութերը տեսական-

մասնագիտական գրականությունը, դատական ակտերը, ինչի շնորհիվ հեղինակին հաջողվել է լիովին բացահայտել թեմայի էությունն ու բովանդակությունը, իսկ աշխատանքում ձևակերպված եզրահանգումներն ու գործական առաջարկությունները ներկայանում են գիտականորեն հիմնավորված և տրամաբանորեն փաստարկված: Հետազոտության տեսական ու գործնական նշանակությունը պայմանավորված է այն հանգամանքով, որ աշխատանքում ներկայացված հետևություններն ու եզրահանգումները օժտված են գիտական և գործնական նշանակությամբ և կարող են նպաստել հետազոտության թեմայի վերաբերյալ պատկերացումների ընդլայնանը, ինչպես նաև հանդիսանալ տեսական և գործնական աղբյուր՝ հետագայում նմանատիպ աշխատանքների մշակման համար:

Այսպիսով, ատենախոսությունը լրացնում է սահմանադրական գիտության այն բացը, որը անձի իրավական դրության գնահատման համար սահմանադրական կարգավիճակի ընկալման նոր տեսական հիմնավորում և գիտական գործիքակազմ է պարունակում: Իր հերթին, հետազոտության իրականացման արդյունքում գիտական նորույթ պարունակող հիմնադրույթներն ամփոփված են աշխատանքի պաշտպանության ներկայացվող դրույթներում, եզրակացություններում, տեսական հետևություններում և գործող օրենսդրության կատարելագործմանն ուղղված գործնական առաջարկություններում:

Դրական գնահատելով աշխատանքը, այնուհանդերձ անհրաժեշտ ենք գտնում ներկայացնել որոշակի նկատառումներ, որոնք հանգում են հետևյալին.

1. Պաշտպանության ներկայացվող 14-րդ կետի դրույթում հեղինակը նշում է, որ անձի իրավական դրության ներպետական երաշխիքների իրացման գործընթացում ներգրավված են պետական իշխանության բոլոր թևերը՝ օրենսդիր, գործադիր և դատական, սակայն չի հստակեցնում, թե վերոնշյալ իշխանության ճյուղերից առավել որոնք են անմիջականորեն ներգրավված անձի իրավական դրության տարրերի իրացան երաշխավորման գործընթացում, ինչը անորոշ է դարձնում տվյալ մարմինների ցանկը:

2. Ատենախոսը աշխատանքի 300-րդ էջից սկսած բավականին համակողմանի վերլուծում է անձի իրավաբանական օգնություն ստանալու իրավունքի երաշխավորվածությանը, քանզի վերջինս հանդիսանում է անձի իրավունքների և ազատությունների պաշտպանության ինչպես ներպետական, այնպես էլ միջազգային իրավական միջոց: Տվյալ համատեսքտում, հեղինակը անդրադառնում է ՀՀ-ում գործող Հանրային պաշտպանի ինստիտուտի գործունեությանը ներկայացնելով ոլորտին առնչվող բարեփոխումներ: Մասնավորապես, ըստ ատենախոսի «(...)Առաջարկում ենք ապահովել իրավահավասարության սկզբունքի դրսևորումը սոցիալական երաշխիքների համարտեքստում, օրենսդրորեն ամրագրելով հանրային պաշտպանների նկատմամբ կիրառվող խրախուսանքի տեսակները և հիմքերը, ինչպես նաև հաշվի առնելով Հանրային պաշտպանի

գրասենյակի ծանրաբեռնվածությունը, որպես սոցիալական երաշխիքի իրականացում միջ-նորդել ՀՀ կառավարությանը որոշ չափով սուբսիդացնել գրասենյակի ծախսերը, օրինակ՝ կրճատելով գրասենյակի կողմից վճարվող հարկերը:(...)» (էջ 307):

Հանգելով այսպիսի կարևոր առաջարկության, հեղինակը չի զարգացնում և չի հաստակեցնում արդյո՞ք գոյություն ունի նմանատիպ միջազգային փորձ, և հանրային պաշտապանի գործունեության ինչպիսի՞ խրախուսանքի տեսակներ օրենսդիրը պետք է սահմանի հանրային պաշտպանների նկատմամբ:

3. Աշխատանքի 3-րդ գլխի 2-րդ ենթագլխում վերլուծելով անձի արժանապատվության՝ որպես իրավունքների և ազատությունների անքակտելի հիմքի, կարևոր դերը անձի իրավական դրության կայացման և զարգացման գործընթացում, հեղինակը անդրադառնում է պետության կողմից անձի արժանապատիվ կյանքի երաշխավորաման կարևորությանը: Այնուամենայիվ, հեղինակը չի բացահայտում «արժանապատիվ կյանք» հասկացության էությունը, վերջինիս փոխակապակցվածությունը անձի հիմնական իրավունքների և ազատությունների հետ, ինչը մեր կարծիքով, կարևորվում է արդի սոցիալ-տնտեսական և իրավաքաղաքական զարգացումների համատեքստում:

Այնուամենայնիվ, մատնանշված նկատառումներն, ըստ էության, կրում են մասնակի և խորհրդատվական բնույթ, և չեն արժեզրկում հաջողված գիտական աշխատանքի ընդհանուր դրական արժանիքները:

Ատենախոսության կառուցվածքը թույլ է տվել հեղինակին համակարգային, բազմակողմանի, ամբողջական և ճիշտ եղանակներով լուծել հետազոտության թեմայի վերաբերյալ առաջ քաշված խնդիրներները: Աշխատանքը օժտված է գիտական արժանահավատ մակարդակով, աչքի է ընկնում մոտեցումների ու արդյունքների գիտական նորույթով, ունի ներքին միասնություն, համակարգվածություն, համալիրություն, հարուստ միջուկորտային աղբյուրագիտական հիմքեր:

Ատենախոսությունը և սեղմագիրը պատրաստված են ներկայացվող պահանջներին համապատասխան: Սեղմագրում լիարժեքորեն արտացոլված է ատենախոսության հիմնական բովանդակությունը, իսկ ատենախոսական աշխատանքի հիմնական դրույթներն արտացոլվել են հեղինակի մենագրություններում և գիտական հոդվածներում: Ատենախոսության թեման և բովանդակությունը համապատասխանում են ընտրված մասնագիտությանը:

Ելնելով վերոշարադրյալից, գտնում ենք, որ Լիլիթ Արմենի Ղազանյանի «Անձի իրավական դրության հիմնախնդիրները. Սահմանդրաիրավական հետազոտություն» թեմայով դոկտորական ատենախոսությունը իրենից ներկայացնում է արդիական, գիտական նորույթ պարունակող ամբողջական, տեսական և գործնական նշանակություն ունեցող ավարտուն, ինքնուրույն հետազոտական աշխատանք, որը ներառում է սահմանադրական իրավունքի,

օրենսդրության, իրավակիրառ պրակտիկայի համար կարևոր նշանակություն ունեցող անձի իրավական դրության խնդիրների վերաբերյալ գիտական հիմնավորված լուծումներ:

Վերը շարադրվածը հիմք է տալիս եզրակացնելու, որ Լիլիթ Արմենի Ղազանջյանի «Անձի իրավական դրության հիմնախնդիրները. Սահմանդրաիրավական հետազոտություն» վերտառությամբ դոկտորական ատենախոսությունը համապատասխանում է Հայաստանի Հանրապետության կառավարության 1997 թվականի օգոստոսի 8-ի N 327 որոշմամբ հաստատված «ՀՀ-ում գիտական աստիճանաշնորհման կանոնակարգ»-ով սահմանված ատենախոսությանը ներկայացվող պահանջներին, իսկ հեղինակն արժանի է ԺԲ.00.02 - Հանրային իրավունք (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում) մասնագիտությամբ իրավաբանական գիտությունների դոկտորի աստիճանի շնորհմանը:

Առաջատար կազմակերպության կարծիքը քննարկվել և հավանության է արժանացել սահմանադրական իրավունքի ամբիոնի 2026 թ. մայիսի 26-ի նիստում:

**ԵՊՀ իրավագիտության ֆակուլտետի
սահմանադրական իրավունքի ամբիոնի վարիչ
իրավ.գիտ. թեկնածու, դոցենտ**



Վ.Ն. Այվազյան

ԵՊՀ գիտական քարտուղար



Մ.Վ. Հովհաննիսյան

29.05.26թ.